

समे – 12:25

<><><><><><>

PM-Nigeria

प्रधानमंत्री नरेन्द्र मोदी होर अज्ज अबुजा च नाइजीरिया दे राष्ट्रपति बोला अहमद टीनुबु हुंदे कन्नै गल्लबात करै करदे न। श्री मोदी होर दऊं दिनें दे दौरे लेई कल रातीं नाइजीरिया पुज्जे हे। पिच्छले 17एं बरें दरान भारत दे कुसै बी प्रधानमंत्री हुंदा एह नाइजीरिया दा पैह्ला दौरा ऐ। प्रधानमंत्री मोदी ते राष्ट्रपति तिनुबू दौनें मुख्यें बश्कार रणनीतिक सांझ भ्याली दी समीक्षा करडन ते दपक्खी सरबंधें गी अगड़ा बधाने दे होरनें उपाएं पर बी गल्लबात करडन। एहदे मगरा नेकां समझौतें पर दस्तखत होने दी मेद ऐ। प्रधानमंत्री मोदी होर नाइजीरिया च बसे दे भारती समुदाय दे लोकें गी बी संबोधित करडन। अपने दौरे दे दुए गेड़ तैहत प्रधानमंत्री होर कल नाइजीरिया थमां ब्राजील लेई खाना होडन जित्थें ओह जी-20 शिखर सम्मेलन च शामिल होडन। ब्राजील दे राष्ट्रपति लुइस इनासियो लूला दा सिल्वा होर इस सम्मेलन दी मेजबानी करडन। भारत, ब्राजील ते दक्खन अफ्रीका कन्नै जी-20 ट्रोइका दा हिस्सा ऐ ते जी-20 शिखर सम्मेलन दिएं चर्चाएं च हिस्सा लै करदा ऐ। सम्मेलन दरान प्रधानमंत्री मोदी होर बक्ख-बक्ख वैश्विक मुद्दें पर भारत दा नजरिया पेश करगंन ते हाल च गै भारत च लगे दे जी-20 ते वायस ऑफ द ग्लोबल साउथ शिखर सम्मेलन दे नतीजे दी बी चर्चा करडन। जी20 शिखर सम्मेलन थवां बक्ख-बाहरे मोदी होर आलमी सतह दे केई नेताएं कन्नै मलाटी करडन। एहदे परैन्त अपने दौरे दे त्रीए ते खीरले गेड़ तैहत श्री माकदी होर 19 थमां 21 नवम्बर तगर गुयाना दे सरकारी दौरे पर होडन।

<><><><><><>

PM-Ek Ped

प्रधानमंत्री नरेन्द्र मोदी होरें 'एक पेड़ मां के नाम' अभियान गी असरदार बनाने च सैहयोग देने आहले सब्बनें लोकें दा धन्नवाद कीता ऐ। श्री मोदी होरें सोशल मीडिया पर लोकें अग्रे अपील कीती जे ओ अपनी मां दे सम्मान च इक रूक्ख लान ते धरतै गी मती बेहतर थाहर बनाने च अपना जोगदान पक्क गै देन। प्रधानमंत्री होरें 5 जून गी विश्व पर्यावरण दिवस दे मौके उप्पर नमीं दिल्ली दे बुद्ध जयंती पार्क च इक बोहड़ी दा बूहटा लाइयै एक पेड़ मां के नाम अभियान गी शुरु करोआया हा। उनें आखेआ हा जे एह अभियान पिच्छले इक दहाके

दरान जांगली इलाकें च होए दे बाददे लेई भारत दे जतनें गी दर्शाग। उनें हर देशवासी गी अपील कीती ही जे ओह इस अभियान दे तैह्त् अपनी माता दे सम्मान च इक बूहटा लाइयै नां छड़ा पर्यावरण दी राक्खी—हिफाजत लेई सगुआं धरती माता गी हरा—भरा बनाने च अपना योगदान देन।

<><><><><><>

DRDO

रक्षा अनुसंधान ते विकास संगठन—डीआरडीओ नै कल ओडिशा दे समुंदरी कंडूटे पर डॉ. एपीजे अब्दुल कलाम टापुयै थमां भारत दी पैहली लम्मी दूरी दी हाइपरसोनिक मिसाइल दा कामयाबी परीक्षण कीता। इस हाइपरसोनिक मिसाइल गी थेहारबंद बलें लेई डेढ ज्हार किलोमीटर थमां मती दूरी तगर बक्ख—बक्ख पेलोड लेई जाने आस्तै डिज़ाइन कीता गेदा ऐ। इस मिसाइल गी डाक्टर एपीजी अब्दुल कलाम मिसाइल परिसर हैदराबाद आसेआ डीआरडीओ दिएं होरनें लैबाटरिएं ते औद्योगिक भ्यालें कन्नै रलियै स्वदेशी तौर पर विकसित कीता गेआ ऐ। एहदी डुआरी आहली आजमाईश दे मौके पर उत्थे डीआरडीओ दे वरिष्ठ साईंसदान ते थेहारबंद बलें दे बड्डे अफसर बी मजूद हे। इक सोशल मीडिया पोस्ट च रक्षा मंत्री राजनाथ सिंह होरें इस आजमाईश गी इक ऐतिहासिक उपलब्धि करार दित्ता, जेह्दे'नै भारत महत्वपूर्ण ते उन्नत फौजी तकनीकें दी समर्थ आहले चोनमे देशें दे समूह च शामिल होई गेआ ऐ। उनें कामयाब आजमाईश लेई डीआरडीओ, थेहारबंद बलें ते रक्षा उद्योग गी ममारखबाद दित्ती।

<><><><><><>

IFFI

मन्ने—परमन्ने दे फिल्म निर्माता आशुतोष गोवारिकर होरें'गी भारत दे अंतर्राष्ट्री फिल्म उत्सव आईएफएफआई 2024 लेई अंतर्राष्ट्री ज्यूरी दा अध्यक्ष नियुक्त कीता गेआ ऐ। गोवारिकर होरें जोधा अकबर, लगान ते स्वदेश ज्नेई फिल्मां बनाई दिआं न। इस मौके पर उनें आखेआ जे बड़ी मती प्रतिश्ठा आहले इस फिल्म उत्सव कन्नै जुडना उंदे लेई बड़े गै मानै आहली गल्ल ऐ। इस उत्सव दा आयोजन औंदी 20 नवम्बर शा लेइयै 28 नवम्बर तगर गोवा च कीता जा'रदा ऐ। आशुतोष होरें आखेआ ऐ जे बदलदे समें दे कन्नै सिनेमा बी लगातार विकसित होआ करदा ऐ ते इस बदलाव ते विकास दा साक्षी बनने लेई इक फिल्म उत्सव थमां बधिया

होर कोई थाहर नेई होई सकदी। उनें आखेआ जे आईएफएफआई इस बदलाव दी इक मिसाल बनी गेदा ऐ ते ओह एहदा हिस्सा बनियै बड़ा गर्व मैहसूस करै करदे न।

<><><><><><>

Ayurvedic Hospital

दूर-दरेडे इलाकें च रवै करदे लोकें गी इलाज-मुआलजे दिआं बेहतरीन स्थूलतां उपलब्ध करोआने दे मकसद कन्नै सरकारी आयुर्वेदिक अस्पताल आसेआ कल छम्ब हलके च इक दूर-दरेडे ग्रां चौधरेवाला च मुफ्त मेडिकल कैप दा आयोजन कीता गेआ। एहदा सरिस्ता जम्मू-कश्मीर सरकार दे मंत्री सतीश शर्मा हुंदे दिशा-निर्देशों पर कीता गेआ ऐ। इस मेडिकल कैप दे दरान लोकें दिएं इलाज-मुआलजे सरबन्धी जरूरतें गी पूरा कीता गेआ। केई मरीजें गी मुफ्त डाक्टरी सलाह ते दवाईयां बी दित्तिआं गेइयां। इस कैप दे राहें मुकामी लोकें गी सर्जरी, ईएनटी, गायनोकॉलाजी, दवाईएं ते अक्खिएं सरबन्धी सेवां ते दवाईयां मुफ्त दित्तिआं गेइयां। मुकामी लोकें इस कैप दे आयोजन लेई प्रशासन ते मंत्री हुंदा आभार जताया ऐ।

<><><><><><>

Hockey

हाकी च महिलाएं दे एशियन चैंपियन्स ट्रॉफी दे अपने अखीरले ग्रुप स्टेज दे मुकाबले च अज्ज भारत दा सामना जापान कन्नै होग। एह मुकाबला बिहार दे राजगीर हॉकी स्टेडियम व संज्ञां पौने 5 बजे थमां शुरू होग। भारत नै महिलाएं दे एशियन चैंपियन्स ट्रॉफी दे अजें तोड़ी दे बक्ख-बक्ख मकाबलें च शानदार जित्त दा सिलसिला जारी रक्खदे होई कल चीन गी 3-0 कन्नै हराइयै उप्परोतली चौथी जित्त दर्ज कीती। इस जित्त दे कन्नै गै मेजबान भारती टीम 4 मैचें च 12 अंक हासल करियै पैहले नंबर पर बनी दी ऐ। तोआई कल जापान नै मलेशिया गी 2-1 कन्नै हराइयै इस प्रतियोगिता च अपनी पैहली जित्त दर्ज कीती।

<><><><><><>